

15/11/1998

Apec forum tepat: PM (HL)

ab; Abdul Halim Yusuff; Azli Ayob

KUALA LUMPUR: Perdana Menteri, Datuk Seri Mahathir Mohamad berkata, Sidang Kemuncak Kerjasama Ekonomi Asia Pasifik (Apec) adalah forum yang tepat untuk membincangkan usaha mewujudkan rejim kewangan antarabangsa lebih teratur, yang boleh membendung spekulasi mata wang secara keterlaluan.

Ia adalah forum yang betul kerana sebahagian daripada ekonomi Apec terjejas teruk oleh krisis mata wang serantau sedangkan beberapa ekonomi lain sudah mendapat keuntungan daripadanya, kata beliau.

Dalam satu wawancara khas dengan TV Bernama, Dr Mahathir berkata Malaysia akan mengambil peluang untuk membangkitkan isu krisis mata wang pada setiap forum antarabangsa.

"Kita tidak boleh melepaskan walaupun satu forum antarabangsa dan membiarkannya berlalu tanpa kita membawa kepada perhatian mereka masalah yang timbul daripada spekulasi mata wang."

Dr Mahathir berkata beliau akan membangkitkan perkara ini pada Sidang Kemuncak Apec di Kuala Lumpur pada Selasa ini, kerana ekonomi Apec adalah punca sebahagian besar daripada aliran perdagangan dan pelaburan dunia.

Bagaimanapun, kata beliau, untuk mendapatkan pandangan yang seragam daripada negara anggota mengenai perkara ini mungkin agak sukar.

"Saya menjangkakan masa yang lama mungkin tiga atau empat tahun sebelum mereka akan membuat satu keputusan," katanya apabila menyentuh mengenai jangka masa bagi masyarakat antarabangsa untuk mencapai persetujuan berhubung rejim kewangan yang teratur.

"Ia adalah biasa dalam perbalahan antarabangsa seperti ini. Sesetengah negara akan beruntung dan beberapa lagi akan kerugian. Jadi, untuk mendapatkan persetujuan memang sesuatu yang sukar. Jadi, sehingga mereka sendiri pula dilanda (masalah itu) dan saya pasti ini akan terjadi, mereka akan berasakan kesan buruk spekulasi mata wang ini dan pada peringkat itu, saya fikir mereka akan lebih bersedia menerima pandangan kita," kata beliau.

Dr Mahathir berharap Sidang Kemuncak Apec boleh menumpukan kepada sebab yang sebenar krisis ini berlaku, iaitu oleh perdagangan mata wang walaupun ada pihak yang menyalahkan pemerintah negara yang tidak telus.

"Ada juga yang menyalahkan IMF (Tabung Mata Wang Antarabangsa)," tambah beliau.

Ditanya sama ada terdapat sebarang kemajuan dalam soal integrasi ekonomi sejak sidang Apec yang lalu, beliau berkata tidak begitu banyak.

Kata Dr Mahathir, beliau juga mengemukakan pandangan Malaysia pada sidang kemuncak yang lalu di Vancouver tetapi ia tidak diterima.

Tetapi sekarang ada antara negara lain yang berasakan bahawa apa yang diutarakan oleh Malaysia mempunyai asas, bahawa pasaran mata wanglah yang menyebabkan masalah ini, katanya.

Menjawab soalan mengenai liberalisasi yang tidak terbendung dan kesannya ke atas ekonomi Asia Timur, Perdana Menteri menyatakan bahawa beliau akan menimbulkan isu tersebut jika beliau mendapat peluang berbuat demikian.

Bagaimanapun, memandangkan beliau adalah pengerusi sidang kemuncak tahun ini, beliau tidak mungkin dapat bercakap panjang mengenai perkara ini kerana beliau perlu memberi peluang kepada pemimpin lain untuk bercakap.

"Tetapi memangpun kita berasa kalau kita mengadakan dasar liberalisasi ini terlalu cepat sebelum kita bersedia, kita akan menghadapi masalah yang besar. Umpamanya, mereka hendak supaya modal boleh keluar masuk dengan mudah tanpa apa-apa sekatan.

"Pada masa dia masuk memang baiklah, dia membawa kekayaan tetapi apabila dia cabut modal dengan serentak seperti yang dilakukan baru-baru ini, maka negara yang berkenaan akan menghadapi masalah yang amat rumit, amat susah untuk diatasi," katanya.

Menyentuh pendirian Malaysia yang begitu lantang bersuara dalam forum antarabangsa, beliau berkata jika Malaysia memilih untuk berdiam diri, maka negara lain akan terus menekan negara ini.

"Kalau kita tidak bersuara, maka mereka akan teruskan saja segala rancangan mereka tanpa mengambil kira nasib buruk yang menimpa negara membangun. Kita akan bersuara. Kita tidak boleh tutup mulut kerana kalau kita berbuat demikian, akhirnya kita akan menjadi mangsa."

(END)